

Apiculturs grischuns fan quitads

Malsogna d'avieuls as derasa fermamain

DA FLURIN ANDRY / ANR

■ Ina malsogna fitg contagiusa attatga ils pievels d'avieuls en Svizra. Cas da pesta ascha d'avieuls s'han augmentads ils ultims onns fermamain era en Grischun.

La pesta ascha d'avieuls enconuschan ils apiculturs en Europa gia dapi passa 100 onns. Fin dal 1999 han ins dumbrà en Svizra var 50 cas l'onn. Dapi quella giada s'ha augmentada la quantiad da quels cas dentant adina dapli. Sco che la sda ha retschertgà èn vegnids annunziads l'onn passà 796 cas, quest onn gia passa 400 cas. Surtut pertutgads da questa malsogna d'avieuls èn tenor infurmaziuns dal Center svizzer per la perscrutaziun d'avieuls da la Staziun da perscrutaziun Agroscope Liebefeld-Posieux ils chantuns Berna, Soloturn, Turitg, Argovia, Appenzell e Grischun. Ils avieuls da la Svizra franzosa èn per entant anc schanegiads da la malsogna. «Tar nus en chantun èsi il pli mal en il Signuradi ed en la part davant dal Partenz, tranter Igis e Jenins. Quai era il cas gia l'onn passà e quest onn èsi pauc meglier», di *Luzi Caviezel*, collavuratur al Plantahof ed apicultur, «cas datti



Era ils avieuls grischuns èn periclitads da daventar malsaus.

KEYSTONE

era en Surselva, il Scanvetg e cumenzà hai era en Engiadina Basa.» La malsogna attatga sco ch'el declera las larvas dals avieuls, las qualas crappan alura. Ils avieuls creschids na vegnan betg malsaus, els portan dentant il bacterium en els e derasan uschia vina-

vant la malsogna. Per ils umans nun exista nagin privel. «Cumbatter quest bacterium na pon ins prest betg, ins pudess far quai cun antibiotic, ma quai è scumandà. Perquai vegnan ils pievels malsaus destruids», explitgescha Caviezel, «l'onn passà p.ex. han

ins destrui tranter Trimmis, Igis, Landquart, Malans e Jenins 120 pievels d'avieuls.» Impurtant èsi sco ch'el agiunscha ch'ils apiculturs sajan precauts cun cumprar novs pievels d'avieuls e ch'els procurian per ina buna igiena en las chaistas d'avieuls.